

COMUNICATO n. 731 del 23/03/2026

S hòt bail finz as en 19 van oberel. “Stòrcha regionen. Stòrcha Europa. Zòmm!” der spruch 2026

## Euregio: Prais Junga Untersuacher ont Prais naiekaitn, offet de zait ver za toalnemmen 2026

[Mòcheno] S hòt bail finz as de 19 van oberel as kimmpt ver za innschraim se ver de Prais Euregio 2026 “Junga Untersuacher” ont “Naiekaitn”, zuazolt va de Wirtschaftskammer Tirol ont va Poazn ont Trea’t ont gem pet de zòmmòrbet pet en Euregio Tirol- Sudtirol ont Trentin. Der spruch va jaier bart sai’ “Stòrcha regionen. Stòrcha Europa. Zòmm!”. Der zil plaip der sèll za enviretrong de untersuach ont de naiekaitn en de drai lander ont nogea’ en guat enviretrong van Euregio abia sitz ver de birtschòft. Ver en earste vòrt haier barn sai’ zboa de kategori ver an iatn prais. Zboa aukenneta giurie barn ausschaung zbischn de vrong kemmen ont song drai finalistn ver an iata kategori as barn vourstelln de òrbetn bail en Euregio Days en somsta 29 van agest 2026 kan Forum Europeo va Alpbach en Tirol. En sèll mol barn kemmen gem de prais en ber as hòt gabungen.

### Prais Junga Untersuacher

S meing toalnemmen en Prais Junga untersuacher, de untersuacher ont untersuacheren unter de 35jor, as miasn hom gamòcht de òrbet en oa’n van suach institutn van Euregiuo oder as sai’ van Euregio, aa benn de òrbetn en an òndern institut van an iata sait va de bèlt.

De òrbetn, tschrim as englesch, meing kemmen vourtrong en de kategorie “Birtschòft bissnschòftn socialn bissnschòftn, rèchtbissnschòft, lear bissnschòftn, ont mentsch bissnschòftn” ont nou “Techniker bissnschòftn, naturaln bissnschòftn ont medizin”. De prais ver de earstn drai sai’ va 4.500, 2.000 ont 1.000 euro.

Informazionen ont toalnemmen kòftn sai’ as de sait van projekt: [www.euregio.info/it/youngresearcher/](http://www.euregio.info/it/youngresearcher/). Ver òndra vrong mu men riaven s u’stellte mentsch ver en Euregio de Martina Senoner (tel.: +43 512 508 2358, e-mail: [martina.senoner@euregio.info](mailto:martina.senoner@euregio.info)).

### Prais Naikait van Euregio

Pet en Prais Naikait van Euregio de bèrkn as kemmen van gònze Euregio as produktn, teknologi ont naia dinstn paut hom, meing toalnemmen en de nain kategori “Konzeptn/Prototipn” ont “Modeln van business/Konsolidiartn produktn” pet en naia produktn oder o’nungen inntrong.

De prais ver de earstn drai projektn van an iata kategori sai’ va 9.000, 2.000 ont 1.000 euro. Der earste prais ist toalt en s hòlb en gèlt (4.500 euro) ont en s hòlb en dinstn va PR gem va bèrkn va marketing van lònt.

Merera dinger ont der model ver za schraim se inn vinnt men af de sait van projekt:

[www.euregio.info/innovazione/](http://www.euregio.info/innovazione/).

Ver mearera nochrichtn vrok men za klòffen pet en referent Euregio Silvia Ramoser (tel.: +43 512 508 2352, e-mail: [silvia.ramoser@euregio.info](mailto:silvia.ramoser@euregio.info)).

Ibersetz gamòcht van Sprochtirl va de Tolgamoaschòft Hoa Valzegu’ ont Bersntol

(cdt)